

Reaccion

CALYPSO NO TA CULTURA DI ARUBA

Skirbi pa: Habitante di Pariba di Brug
(Number y adres conoci pa Redaccion)

Ata nan ta bin dilanti cu e detaye, cu Calypso tambe mester ta forma parti di Cultura di Aruba. Pasobra e.o. e Caha di Orgel a bin di Italia, Wals a bin di Alemania, etc.

Pero tin un diferencia GRANDI di tur esey. Pasobra bo sa, cu na Aruba tur caminda Mazurka, Wals, y Caha di Orgel ta worde toca pa nos grandinan. Esaki tabata socede hasta prome cu aña 1924, prome cu Lago a bin Aruba. For di e tempo ey caba, Wals y Caha di Orgel, cu su dushi Mazurka tabata toca tur caminda riba e isla aki.

Ta despues cu Lago a habri y cu a importa trahadornan di Islanan Caribense, e ora ey numa "Calypso" a yega.

Corda bon, no ta pasobra un cancion ta hopi popular y ta worde toca tur ora pesey e mester haya status di "cultura". Bao ningun circunstancia!

Ademas, Calypso, ta den tempo di Carnaval so bo ta seuche! Bo no ta tende den otro epoca di aña.

Si Calypso tabata asina bon, di con dia cu un conocido cantante femenino (tempo e tabata mucha chikito) a canta Calypso, ata hendenan grandi a 'boe' esaki. Ningun Arubiano a reacciona e tempo ey!

Corda tambe con Lord Boxoe a canta Calypso na papiamento hopi aña pasa (Basha Awa Bay), y ningun hende a boe. Pero ora un mucha chikito a bay canta, e ora ey si nan a haci hopi beheid.

Calypso ta e musica y e letra, y corda cu aki ta na Aruba nos ta biba, pues e Calypso e por ta Papiamento, Hulandes, Spaño, of Ingles. Ningun caminda ta poni den Statuto di SAC of Asoma, cu e mester ta na Ingles. Ta na Aruba nos ta biba, pues biba cune!

Ata como ehemplo, check con New York Band a haci salsa inmortal na Merca haciendo esaki na ingles. Tambe Orquesta de la Luz a toca musica Spaño na Japon. Di con awor hendenan cu mente frustra ta bin cu declaracion sumamente radical, cu "Calypso mester ta na ingles so"? Esey ta un falta di respet grandi pa Arubianonan.

No tuma nos na malo. Pueblo di Aruba no tin nada contra Calypso. E ta dushi pa Carnaval, ta popular, pero e realidad principal ta cu e ta un cultura di Trinidad. E no ta di nos, pero esey no kiermeen cu nos no por admire y guste.

Mescos ta conta pa Mariachi tambe, e ta un musica hopi gusta y stima, pero nos no por haci nos mes doño di loke no ta di nos. E ta un cultura di Mexico, pero nos por toke cuanto cu nos kier.

Dia cu un hende tribi di menciona cu Mariachi ta cultura di Aruba e mester watchout pa cualkier consecuencia.

No lubida cu e persona cu a interpreta e Calypso ganador, ta un politico aspirante, y e ta busca forma pa haya simpatia di un minoria chikito pa kizas su interesnan personal.

E bleki di cervex cu a ser manda riba MC, ta nada bon. Tur hende a condena esey completamente. Pero comentarionan ta cu e bleki a worde manda riba e persona robez, pasobra ta djis un MC e ta.

Pero por lo menos, nos sa cu tog tabatin "hende inteligente" den multitud, cu si a compronde e mensahe frustra den e cancion. Ta lamentable cu algun otronan a djis a bati man manera galiña sin cabez. Pasobra tin hopi cu a compronde claramente e mensahe di e Calypso, y ta condena su contenido totalmente.

Calypso ta di Trinidad. Si bo gusta Calypso pasobra bo a lanta cune y debi cu bo mayornan a bin di afo ta bo derecho. Pero no bin pretende cu pueblo henter tin di acepte, pasobra realmente Calypso no ta forma parti di nos cultura!

Pena la vida di cualkier politico, cu mester aproba esaki. Pasobra e lo haya henter pueblo di Aruba contra dje. Pasobra si algo no worde haci, cuidao cu mañan ata "Vallenato" tambe ta bira nos cultura. Ata cuidao cu "Reggae" tambe ta bira nos cultura.